

欽定大清會典事例

卷

一千零十七至  
一千零二十

都察院  
各道

欽定大清會典事例卷一千十七

都察院

各道

稽察部院事件  
註銷限期  
稽察軍機處  
稽覈王公大臣名下  
太監  
稽

察部院書吏  
刷卷

稽察部院事件。康熙四年議准。御史稽察各部院事件。月終用該道印具題。○十六年

諭。向來各衙門事件。關係重大者。雖有定限赴科道稽察。但事有易結者。即應速結。必俟限滿方行題覆。多致壅滯。更有各項呈狀。不係註銷者。任意耽延。藉端拘提人犯。數月不為審結。無辜牽連。殊堪憫惻。以後

具題本章。悉令速行辦理。不必盡拘定限。至於審理事件。亦速為完結。著照註銷欽件例定限。每月造冊赴都察院科道稽察具奏。爾等各宜力圖振作。體恤民隱。以副朕意。○又議准部院督撫具題及科鈔事件。皆令造冊送各道稽察。○十八年議准大小官員。在衙門不待事畢。推諉滿官。早歸遲進。燕會嬉游者。或辦理公務。瞻徇遲延。不行即結者。司官聽堂官題叅。堂官聽科道題叅。○四十四年覆准各衙門科鈔及彙題事件。註銷日將原案齎送察覈。○四十五年題准嗣後凡奏

聞及照常行文事件。各部院衙門令該司官親自造冊。送各科道註銷。月終彙奏。○雍正元年議准。各部院一應咨提行詢事件。一面咨行該處。一面知會科道存案。若逾限期。令行文之部院參劾。如行文之部院徇隱不參。科道即將逾限各官。及不行參劾之部院。一併列參。○又議准。寶泉局寶源局。停止滿漢科道註銷。○三年

諭。凡速議事件。與尋常事件。業已定有限期。嗣後務遵定限。議覆歸結。儻有行詢他處。咨提人犯。不能依限歸結者。於限滿之日。聲明情由。交送內閣奏聞。如並

無別項情由。而逾限不結。科道即行糾叅。儻科道不叅。著內閣都察院一併叅奏。○又奏准。部院各衙門。每月將已未完結科鈔事件。造冊分送科道。勘對限期。有遲延違誤者。覈叅。○又覆准。八旗行各部院事件。均送科道衙門註銷。但八旗皆清字公文。必須譯出漢文。始可定稿結案。嗣後行文各部院衙門事件。無論應否具題之件。均限三十日完結。○又議准。凡一應奉

旨交議事件。與摺奏事件。均令於到部之日。即將緣由聲明。知會內閣。並科道。如有逾限。即行題叅。

○四年

諭。嗣後應於八旗完結事件。不行完結。推諉部院者。都察院即行叅奏。應於部院完結事件。不行完結。推諉八旗者。亦行叅奏。○五年

諭。向來督撫提鎮陳奏本章。例有副本投遞通政使司。又有揭帖。知會關涉之各部院。往往緊要之事。未達朕前。而先已傳播於衆口。又如內外咨呈文書往來。該衙門尤易疏忽。以致匪類探聽。多生弊端。聞有緝拏之犯。聞風遠颺。遂至漏網。此皆不慎不密之故。貽誤匪輕。嗣後一切本章咨呈文書。除尋常通行事件。

外。其有案關緊要。及緝拏人犯。內外各衙門應密封投遞。各該管官應謹慎辦理。以防漏洩。儻有疏忽。事發究明根由。必將洩漏之人。及該管官從重治罪。其稽察之處。交與科道官。儻有疏忽洩漏之事。科道不行查出。一併處分。欽此。遵

旨議定。嗣後應密之事。並不密封。以致漏洩者。將封發官叅劾。如收受承辦官不慎。以致漏洩者。將收受承辦官叅劾。事理重者降一級留任。輕者罰俸九月。該管科道官不稽察糾叅。罰俸六月。○六年議准。嗣後除漏洩密封事件。仍照定例分

別議處治罪外。其雖非密封。但未經

御覽批發之本。章一概嚴禁。不許刊刻傳播。如報房與書吏。彼此句通。本章一到。即鈔錄刊刻圖利。及捏造訛名。並招搖詐騙情弊。各照例分別治罪。該管官失於覺察。科道不行糾叅。皆照漏洩密封事件例。分別議處。○又

諭。各衙門事件。交與科道官稽察。欲其按限歸結。不致遲誤。近見科道行詢之案。該衙門隨便託辭回覆。而科道遂不復問情由。是科道之稽察。不過察其遺漏而已。其遲延之故。並未致問。殊非差委科道之本意。

嗣後該衙門託辭回覆。科道官並不詳察。定將科道官一併處分。○七年奉

旨。崇文門稅課司。事務繁多。不必按月註銷。○又奏准。太常寺。光祿寺。大理寺。鴻臚寺。順天府。鑾儀衛。欽天監。與各部院文移往來。又有關係錢糧之事。著將所辦一應事件。每月兩次造冊。送科道依限察覈。○乾隆四年議准。各部院議覆一應條奏事件。奉

旨。後將原奏知會各道存案。以備稽察。○又奏准。各部院註銷。惟戶兵二部。將事件原稿並冊赴科

道檢覆其餘各衙門。皆不送原稿。止將事由冊  
填寫已完未完字樣。嗣後令各司將已未完結  
詳造清冊。送督催所。該所就近傳取各號簿。勘  
對明確。如果無蒙混。該督催所於各司冊尾。填  
寫勘對明確。並無遺漏遲延字樣。列銜畫押。鈐  
印付各司經承。持送科道衙門註銷。如有遺漏  
遲延。該督催所即行呈堂。酌量辦理。科道仍不  
時稽察。分別奏

聞。儻督催所不行查出回堂。經科道查出。將該司督  
催所一併議處。○又議准。各部院八旗辦理案

件。有將不應駁之事濫駁者。均令科道覈叅。○  
又議准理藩院堂司各官。均係滿洲蒙古。一切  
冊籍。均係清字。是以造送註銷冊。並三法司會  
稿。亦係清字。由滿洲御史註銷畫題。嗣後理藩  
院註銷冊。並三法司會稿。該道筆帖式。譯出漢  
文。滿洲御史校正。與漢御史公閱畫題。至順天  
府衙門。均係漢官。是以註銷冊專用漢字。由漢  
御史註銷。嗣後滿漢御史公同註銷畫題。○又  
奏准候補候選以及曾經議處人員。果有真正  
冤抑。自行赴都察院具呈。查明應行准理者。行

文調取該部辦理原案。及一應定例。如實係舛錯。即為奏請更正。該部堂司官。如有辦理未協。亦即奏明請

旨察議。儻有營私受託等弊。都察院一經訪確。即令查叅。○六年奏准。除密議密奏外。其餘所奉一切傳鈔

諭旨。

批發摺奏事件。應某衙門承鈔辦理。並傳該科一同鈔錄報院。轉發各科道閱看。○十四年奏准。在京各衙門。現行註銷事件。雖六部事務繁多。其

餘衙門。有每月僅十數件及數件不等者。今既定為十五道。分管稽察。自應按照十五道。分辦註銷事件。各繕一本具題。○又題准內閣翰林院詹事府都察院六科中書科五城宣課司左右翼監督寶泉局寶源局漕運總督河道總督向不註銷。揆厥由來。內閣為

綸扉重地。專辦進本票籤事宜。且現有欽奉

上諭處。專司稽察翰林院詹事府專備

經筵日講。入直撰文。六科專司封駁發鈔。中書科專

辦

誥敕與部院所辦事件。原屬不同。故向例並不造冊送道註銷。至宣課司寶泉局寶源局。於雍正年間。欽奉

諭旨。不必按月註銷。左右翼監督。係專管收稅。自行覈實具奏。向例亦不造冊。五城事件。現經奏准設立督催所。專委御史按限覈催。又五城審送刑部事件。例係都察院兩月一次具題註銷。漕運總督河道總督駐紮外省。其題達事件。向係揭報該道稽察。嗣後仍令各道照舊辦理。○十八年議准。各旗應領祿米兵餉。所造冊籍。於何日

咨部。部內於何日劄倉。各倉於何日開放。均報明都察院察覈。儻有遲延。即行指叅。○十九年議准。直省所辦

旌表壽民節孝

賜卹祭葬等事。由禮部議定。無論單題彙題。奉

旨之日。皆鈔錄原案。開載姓名。知會經管衙門及直省。辦完彙入奏銷。經管衙門。自可就原案覈對。如有不符。大則題駁。小則咨駁。亦皆有成例可循。無如書吏漫不經心。止圖展限。並不覈對原案。一概行詢。視其來文。亦並無可登答。惟再鈔

原題原奏咨覆而已。嗣後如有應駁之處。徒藉行詢為展限之計。該稽察衙門即行糾叅。○二十九年議准。嗣後各倉開放米石。戶部仍將旗分倉口。先行知照江南道倉監督。即將日放米數。每月造冊送江南道。各該處亦將實領米數造冊並原稿。於下月初十日內一併送該道察覈。米數相符者。聽江南道按月註冊。年終彙奏。僅有舛錯。照例查叅。○又奏准。嗣後各倉支放豆麥。應隨同米石。一併造冊送江南道察覈。○三十二年奏准。嗣後各部院衙門。委當月章京。

將所收事件。節摘事由。於何日文到之處。一併開寫明白。三日內咨行科道衙門。即行註冊。註冊之日。照所造文冊。逐件按期察覈。八旗事件。亦照此辦理。○三十三年奏准。嗣後各部院及八旗都統衙門。一應文移。俱令本衙門填寫日期。咨送。儻有僅寫年月。不填日期者。許收到文書之衙門。於每月註冊時。送科道衙門驗明。於註冊本內聲明附叅。儻各衙門仍有收無日期文書。自填日期者。經科道等查出。一併題叅。○

嘉慶五年奉